

255.

Na osnovu člana 14. stav 1. Zakona o kantonalnim ministarstvima i drugim tijelima kantonalne uprave – Prečišćeni tekst („Službene novine Zeničko-dobojskog kantona“, broj: 13/08), a u vezi sa članom 11. Zakona o samostalnim umjetnicima („Službene novine Zeničko-dobojskog kantona“, broj: 02/05), ministrica Ministarstva za obrazovanje, nauku, kulturu i sport Zeničko-dobojskog kantona, d o n o s i :

**PRAVILNIK
O USLOVIMA I POSTUPKU PRIZNAVANJA
PRAVA SAMOSTALNIH UMJETNIKA NA
UPLATU DOPRINOSA IZ BUDŽETA KANTONA**

DIO PRVI - OSNOVNE ODREDBE

**Član 1.
(Predmet pravilnika)**

- (1) Ovim pravilnikom uređuju se uslovi i utvrđuje postupak za priznavanje prava samostalnih umjetnika na uplatu doprinosa za penzijsko i invalidsko, zdravstveno osiguranje i nezaposlene iz sredstava Budžeta Zeničko-dobojskog kantona (u daljem tekstu: doprinosi), a čije umjetničko stvaralaštvo i djelovanje predstavlja poseban doprinos kulturi i umjetnosti Zeničko-dobojskog kantona i Bosne i Hercegovine.
- (2) Pravilnikom se također utvrđuje detaljnije način i postupak imenovanja Stručnog vijeća kao konsultativnog tijela ministra nadležnog za poslove kulture (u daljem tekstu: ministar).

**Član 2.
(Zahtjev za plaćanjem doprinosa)**

- (1) Samostalni umjetnik koji ispunjava uslove iz čl. 2. i 10. Zakona o samostalnim umjetnicima („Službene novine Zeničko-dobojskog kantona“, broj: 02/05) (u daljem tekstu: Zakon) ima pravo podnijeti Ministarstvu za obrazovanje, nauku, kulturu i sport (u daljem tekstu: Ministarstvo) zahtjev da mu se doprinosi plaćaju iz sredstava budžeta Zeničko-dobojskog kantona.
- (2) Zahtjev iz prethodnog stava rješava Ministarstvo u postupku i prema uslovima propisanim ovim pravilnikom.
- (3) Ministarstvo provodi i postupak revizije priznatih prava samostalnih umjetnika po odredbama ovog pravilnika.

DIO DRUGI - DJELOKRUG I NAČIN RADA STRUČNOG VIJEĆA

**Član 3.
(Sastav Stručnog vijeća)**

- (1) Stručno vijeće imenuje ministar Ministarstva, a čine ga: po jedan predstavnik Ministarstva, Udruženja književnika Zeničko-dobojskog kantona, Udruženja muzičkih pedagoga Zeničko-dobojskog kantona, Udruženja likovnih umjetnika Zeničko-dobojskog kantona i Pozorišnih umjetnika.
- (2) Stručno vijeće donosi Poslovnik o svom radu.

**Član 4.
(Rad Stručnog vijeća)**

- (1) Stručno vijeće radi u sjednicama uz učešće stalnih članova-predstavnika umjetničkih strukovnih udruženja.
- (2) Stručno vijeće ima predsjednika.
- (3) Sjednice Stručnog vijeća saziva predsjednik Vijeća na prijedlog ministra ili članova krajem godine, a najkasnije do 30. oktobra tekuće godine.
- (4) Stručno vijeće može raditi u prisustvu većine članova.
- (5) Razmatranje zahtjeva samostalnog umjetnika je javno.
- (6) Odluka o davanju preporuke Ministarstvu donosi se većinom glasova od ukupnog broja članova Vijeća.
- (7) O radu Stručnog vijeća vodi se zapisnik.

**Član 5.
(Mandat članova Stručnog vijeća)**

- (1) Mandat članova Stručnog vijeća traje 4 (četiri) godine.
- (2) Zbog nesavjesnog i neurednog obavljanja dužnosti, članovi Stručnog vijeća mogu biti opozvani tokom mandata, a na prijedlog predsjednika Stručnog vijeća.
- (3) Opoziv člana Stručnog vijeća vrši se po postupku i na način po kojoj je izvršeno imenovanje.
- (4) Članu Stručnog vijeća kojeg je predložilo umjetničko strukovno udruženje prestaje mandat i prestankom članstva u matičnom udruženju koje ga je imenovalo.
- (5) Za rad u Stručnom vijeću članovima pripada naknada čiji će se iznos utvrditi posebnim rješenjem Ministra.

DIO TREĆI - POSTUPAK PRIZNAVANJA PRAVA SAMOSTALNIH UMJETNIKA NA UPLATU DOPRINOSA

**Član 6.
(Sticanje prava na uplatu doprinosa)**

- (1) Da bi samostalni umjetnik stekao pravo na uplatu doprinosa uz bavljenje umjetničkim stvaralaštvom i djelovanjem kao jedinim zanimanjem, mora ispuniti uslove

propisane kriterijumima iz pravilnika kojim se uređuju bliži kriterijumi za priznavanje statusa samostalnih umjetnika.

- (2) Smatrat će se da bavljenje umjetničkim stvaralaštvom i djelovanjem nije samostalnom umjetniku jedino zanimanje, ako je u prethodnoj godini, ostvario plaću izvan umjetničkog stvaralaštva i djelovanja u iznosu većem od prosječno ostvarene neto plaće zaposlenika u Zeničko-dobojskom kantonu.
- (3) Zahtjev za priznavanje prava na uplatu doprinosa podnosi se Ministarstvu najdalje do 31. oktobra tekuće godine.

Član 7.

(Zahtjev za priznavanje prava)

Zahtjev samostalnog umjetnika za priznavanje prava treba sadržavati:

- a) pismenu prijavu s ličnom i umjetničkom biografijom,
- b) detaljan opis umjetnikovog javnog djelovanja uz cjelovitu dokumentaciju o osnovnom umjetnikovom stvaralaštvu,
- c) preporuku umjetničkog strukovnog udruženja osnovnog umjetničkog stvaralaštva i djelovanja podnosioca zahtjeva, uz dokaze o njegovom javnom djelovanju ukoliko je član udruženja,
- d) potvrdu poreske uprave o tome da li je podnosilac zahtjeva u prethodnoj godini bio poreski obveznik, koje vrste, kao i ostvareni dohodak od neumjetničke djelatnosti.

Član 8.

(Razmatranje umjetničkog stvaralaštva podnosioca zahtjeva)

- (1) Stručno vijeće će razmatrati cjelokupno javno objavljeno i priznato umjetničko stvaralaštvo i djelovanje podnosioca zahtjeva.
- (2) Pri razmatranju umjetničkog stvaralaštva i javnog djelovanja podnosioca zahtjeva za utvrđivanje prava po odredbama ovoga pravilnika, Stručno vijeće uzima u obzir da li njegovo umjetničko djelovanje predstavlja poseban doprinos kulturi i umjetnosti Zeničko-dobojskog kantona i Bosne i Hercegovine.

Član 9.

(Preporuka Stručnog vijeća)

Preporuku Ministarstvu u vezi sa zahtjevom samostalnog umjetnika, uz obrazloženo mišljenje, daje Stručno vijeće u postupku i prema uslovima propisanim ovim pravilnikom.

Član 10.

(Rješenje o priznavanju prava na uplatu doprinosa)

- (1) Na osnovu preporuke Stručnog vijeća, Ministarstvo donosi rješenje o priznavanju prava na uplatu doprinosa, odnosno o odbijanju podnesenog zahtjeva.
- (2) Na osnovu rješenja o priznavanju prava na uplatu doprinosa vrši se prijavljivanje samostalnih umjetnika prema mjestu prebivališta Federalnom zavodu za mirovinsko/penzijsko i invalidsko osiguranje, Zavodu za zdravstveno osiguranje Zeničko-dobojskog kantona i Službi za zapošljavanje Zeničko-dobojskog kantona čime samostalni umjetnik stiče pravo na korištenje penzijskog i invalidskog osiguranja, te pravo na korištenje zdravstvenog osiguranja i nezaposlene.
- (3) Pravo iz prethodnog stava ovog člana samostalnom umjetniku pripada od dana pravosnažnosti rješenja.

Član 11.

(Podnošenje dokumentacije nakon priznavanja prava na uplatu doprinosa)

- (1) Samostalni umjetnik kojem je priznato pravo na uplatu doprinosa treba najkasnije u roku od 3 (tri) mjeseca podnijeti potrebnu dokumentaciju za prijavu Federalnom zavodu za mirovinsko/penzijsko i invalidsko osiguranje, Zavodu za zdravstveno osiguranje Zeničko-dobojskog kantona i Službi za zapošljavanje Zeničko-dobojskog kantona.
- (2) Smatrat će se da je samostalni umjetnik odustao od zahtjeva za priznavanje prava na uplatu doprinosa ukoliko u roku iz stava 1. ovog člana ne podnese potrebnu dokumentaciju, te će se rješenje o priznavanju toga prava staviti izvan snage.
- (3) Ministarstvo dostavlja redovno Federalnom zavodu za mirovinsko/penzijsko i invalidsko osiguranje, Zavodu za zdravstveno osiguranje Zeničko-dobojskog kantona i Službi za zapošljavanje Zeničko-dobojskog kantona kopiju rješenja o priznatom statusu samostalnih umjetnika i drugu potrebnu dokumentaciju radi ostvarivanja priznatih prava.

Član 12.

(Obavještavanje strukovnih udruženja)

Svake godine po donošenju budžeta Zeničko dobojskog kantona, Ministarstvo obavještava odgovarajuća strukovna udruženja o odobrenim sredstvima za uplatu doprinosa samostalnim umjetnicima.

DIO ČETVRTI - POSTUPAK REVIZIJE**Član 13.****(Revizija priznatih prava na uplatu doprinosa)**

- (1) Ministarstvo će najmanje jednom u četiri (4) godine po službenoj dužnosti putem Stručnog vijeća, provesti reviziju priznatih prava svih samostalnih umjetnika na uplatu doprinosa.
- (2) Samostalnom umjetniku kojem je priznato pravo na uplatu doprinosa, nakon četiri (4) godine po ostvarivanju tog prava, Ministarstvo će provesti reviziju priznatih prava u odnosu na njegovo umjetničko stvaralaštvo, a prema kriterijima iz posebnog pravilnika.
- (3) U provođenju revizije Ministarstvo može kombinovati kriterije u okviru srodnih područja umjetničkog stvaralaštva obuhvaćenih posebnim pravilnikom, uz uslov da su za svako umjetničko područje pretežno ostvareni propisani kriteriji.

Član 14.**(Uslovi revizije)**

Za reviziju priznatih prava na uplatu doprinosa samostalni umjetnik mora se baviti umjetničkim stvaralaštvom kao jedinim i glavnim zanimanjem i javno umjetnički djelovati, s tim da samostalni umjetnik kome je to pravo priznato u prethodnom periodu zadržava to pravo sve do trenutka kada prestane ispunjavati uslove utvrđene ovim pravilnikom i zakonom.

Član 15.**(Produžetak vremena mirovanja statusa)**

U postupku revizije uzima se u obzir vrijeme provedeno na bolovanju duže od jedne godine dana ili porodijskom odsustvu tako što će se vrijeme mirovanja statusa i prava produžavati srazmjerno vremenu provedenom na navedenom odsustvu.

Član 16.**(Dokazi o umjetničkom djelovanju)**

- (1) Uz potrebnu dokumentaciju za reviziju prava samostalnih umjetnika, svaki samostalni umjetnik mora priložiti podatke i dokaze o svom umjetničkom djelovanju u posljednje četiri godine.
- (2) Potrebnu dokumentaciju iz prethodnog stava samostalni umjetnik dužan je dostaviti Stručnom vijeću u roku od 30 dana po dobivenoj obavijesti o pokretanju postupka revizije.

Član 17.**(Uslovi kada stvaralaštvo samostalnog umjetnika ne podliježe reviziji)**

- (1) Umjetničko stvaralaštvo samostalnog umjetnika ne podliježe kriterijima za reviziju priznatih prava nakon isteka određenog broja godina javnog umjetnikovog djelovanja na njegovom primarnom umjetničkom području i to:
 - a) baletno-plesni umjetnici nakon 18 godina.
 - b) muzičko-scenski umjetnici nakon 20 godina.
 - c) svi ostali umjetnici nakon 25 godina.
- (2) Iako umjetničko stvaralaštvo i javno umjetničko djelovanje samostalnog umjetnika iz stava 1. ovog člana ne podliježe reviziji, samostalni umjetnik je dužan svake godine Stručnom vijeću na njegov poziv predložiti podatke i činjenice o svom umjetničkom djelovanju.

Član 18.**(Rješenje o rezultatima revizije)**

O rezultatima revizije prava samostalnih umjetnika, Ministarstvo donosi rješenje koje se dostavlja samostalnom umjetniku, matičnom udruženju i zavodima penzijskog i invalidskog, te zdravstvenog osiguranja i službi za zapošljavanje.

DIO PETI - PRELAZNE I ZAVRŠNE ODREDBE**Član 19.****(Prestanak važenja ranijih propisa)**

Stupanjem na snagu ovog pravilnika na području Zeničko-dobojskog kantona prestaje primjena Samoupravnog sporazuma o utvrđivanju osnovica za obračun doprinosa za zdravstvenu zaštitu, penzijsko i invalidsko osiguranje samostalnih umjetnika („Službeni list SR BiH“, broj: 27/83 i 18/90).

Član 20.**(Stupanje na snagu)**

Ovaj pravilnik stupa na snagu osmog dana od dana njegovog objavljivanja u „Službenim novinama Zeničko-dobojskog kantona“.

Broj: 10-02-16531-1/09
Datum, 24.06.2009. godine
Zenica

MINISTRICA
Zdenka Merdžan, s.r.